

Immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaat

Avatangiisit innarlitsaaliorneqarnissaannik Inatsisartut peqqussutaanni nr. 12, 22. december 1988-imeersumi, Inatsisartut peqqussutaatigut nr. 7, 13. maj 1993-imeersukkut allanngortinneqartumi, § 7, imm. 1, nr. 15, § 15 aamma § 46, imm. 2 naapertorlugin aalajangersarneqarput:

Kitaani utertitsisarneq

§ 1. Immiaaqqat imeruersaatillu kulsyrimik akullit taamaallaat tuniniarneqarlutillu sassaalliuutigineqaqqusaapput utertittakkanik pooqartillugit, nalunaarummut uunga ilanngussami immikkut nalunaarsukkanik eqqortitsisunik.

Imm. 2. Puut utertittakkat nalunaarummi uani pineqartut, tassaapput puut utertitsisarnermi atorneqartut, atuisumit imarneqareernermikkut amerlanerpaartaat immeqqitassanngorlugit utertinneqartartut.

Avannaani Tunumilu utertitsisarneq

§ 2. Immiaaqqat imeruersaatillu kulsyrimik akullit taamaallaat tuniniarneqarlutillu sassaalliuutigineqaqqusaapput ataasiarluni atorneqarsinnaasunik pooqartillugit utertitsisarnermi Naalakkersuisut akuerisaanni ilaatinneqarsinnaasunik.

Imm. 2. Ataasiarluni atorneqarsinnaasunik puunik utertitsisarnermi periaaseq nalunaarummi uani pineqartoq tassaavoq akiliuteqartarneq poorineqartut atuisumit imarneqareernermikkut pisiniarfimmuit, pilersuisut aqqutigalugit poorineqartut atoqqinnejqarnissaannut utertitsinissamik qularnaarisussamut, utertinneqarnissaannik qularnaarisooq.

Ataatsimut aalajangersakkat

§ 3. Kinaluunniit immiaaqqanik imeruersatinillu kulsyrimik akulinnik sunilluunniit tuniniaallunilu sassaalliuuteqartartoq suut poorineqarnerannik, puunknik utertitsisarnerup qanoq ingerlaneranik, tassunga ilanggullugu puukut utertinneqartartut procentit qassiunerannik aamma puukut utertinneqartut qanoq akilerneqartarnerannik, naalakkersuisut piumasaqarnerisigut paassisutissiinissamut aammalu poorineqartunut misiligutinik tunniussinissaminut pisussaavoq.

Imm. 2. Imm. 1 naapertorlugu paassisutissiisutigineqartut il.il. takutippassuk, avatangiisit mingutsinneqannginnissaat aamma eqqaavilerisut persaqusersorneqannginnissaat suusupagineqarsimasut, taava naalakkersuisut immikkut piumasaqatinik aalajangersaasinnaapput, soorlu puukut utertinneqartut qanoq akilerneqartarnissaat aamma puunknik utertitsisarnermi periaaseq pillugit.

§ 4. Pilersuinikkut ajornartorsiortoqalerpat pissutsilluunniit immikkut ittut allat naatsorsuutigisariaqalerpata, Avatangiisirut Pingortitamullu Naalakkersuisup akuersissutigisinnaavaa immiaaqqat imeruersaatillu kulsyrimik akullit ataasiaannarluni atorneqarsinnaasunik pooqartillugit tuniniarneqarlutillu sassaalliuutigineqarsinnaanissaat.

Nakkutilliineq

§ 5. Nalunaarummi uani malittarisassat malinneqarnersut kommunalbestyrelsit nakkutigissavaat.

Imm. 2. Puut qanoq ittuussutsimikkut nalunaarummi uani pineqartunut naapertuutinngitsut peerneqarnissaat pillugu communalbestyrelsi peqqusilluni nalunaaruteqarsinnaavoq.

Imm. 3. Nakkutilliinermut atortisinermullu Avatangiisit innarlitsaaliorneqarnissaat pillugu inatsisartut peqqussutaanni kapitali 4-mi § 44, imm. 2-mi malittarisassat aamma atuupput.

Naammagittaalliuuteqarneq

§ 6. Nalunaarut una naapertorlugu aalajangikkat tamarmik Avatangiisit innarlitsaaliorneqarnissaat pillugu inatsisartut peqqussutaanni kapitali 10-mi malittarisassat naapertorlugit naammagittaalliuutigineqarsinnaapput.

Pineqaatissisarnermut aalajangersakkat

§ 7. § 1, imm. 1-imi, § 2, imm. 1-imi aamma § 3, imm. 1-imi aalajangersakkanik kiisalu § 3, imm. 2 naapertorlugu piumasaqaatitut aalajangersakkanik unioqqutitsinerit akiliisitaanermik pineqaatissinneqatigineqarsinnaapput.

§ 8. Aktiaateqarluni piginneqataassuteqarluniluunniit ingerlatseqatigiiffik, piginneqatigiilluni ingerlatseqatigiiffik (piginneqatigiiffik) assigisaalluunniit unioqqutitsisuuppat ingerlatseqatigiiffik inatsisini taama isigineqarnini naapertorlugu akiliisussanngortinneqarsinnaavoq. Namminersornerullutik Oqartussat, kommunit imaluunniit kommunit suleqatigiiffiat unioqqutitsisuuppat Namminersornerullutik Oqartussat, kommunit kommunilluunniit suleqatigiiffi taamaannermissut akiliisussanngortinneqarsinnaapput.

Atuutilersitsinermi aalajangersakkat

§ 9. Nalunaarut 1. august 2002-mi atuutilersinneqarpoq tassungalu peqatigitillugu atorunnaarsinneqarpoq immiaaqqat imeruersaatillu kulsyremik akullit puui pillugit nalunaarut nr. 8, 11. marts 1998-imeersoq

§ 10. Nalunaarut una atuutinngilaq Kalaallit Nunaata illersornissaa pillugu isumaqatigiissut 27. april 1951-imeersoq naapertorlugu danskit amerikamiullu illersorfissatut pilersitaanni.

Namminersornerullutik Oqartussat, ulloq 28. maj 2002.

Edward Geisler

/

Hans J. Høyer

Ilanngussaq

Puiaasap titartarneqarnera 1

Puiaasap titartarneqarnera 2

Puiaasap titartarneqarnera 3

Puiaasap titartarneqarnera 4

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut